

SFO obustavio istragu protiv Hamovića

Novi direktor britanskog Odjela za teški privredni kriminal (SFO) izdao je naređenje da se obustavi istraga koju je ova služba vodila protiv srbijanskog biznismena Vuka Hamovića. Richard Alderman koji je prošloga mjeseca stupio na poziciju direktora SFO-a, odbacio je predmet koji je ovaj odjel vodio protiv dugogodišnjeg predsjednika londonske kompanije Energy Financing Team (EFT). EFT se bavi trgovinom strujom i ima značajne poslovne aranžmane u Bosni i Hercegovini (BiH).

‘Odbacili smo predmet zbog pravnog savjeta u kojem je izneseno da je mala mogućnost uspješnog završetka sudskog procesa’, izjavio je glasnogovornik SFO-a Sam Jaffa. U Velikoj Britaniji tužioci imaju obavezu da preuzmu predmet za koji postoji vjerovatnoća veća od 50 posto da će biti uspješno okončan. Izgleda da ovaj predmet nije prešao taj prag.

Ured Državnog tužilaštva je zatražio nezavisnu procjenu dokaznog materijala, izjava svjedoka, kao i ostalog materijala, uključujući i razgovor sa istražiteljima SFO-a, kaže Jaffa. Nezavisni stručnjaci nisu se složili sa ocjenom tima SFO-a da postoji dovoljno dokaza za pokretanje postupka protiv Hamovića. Slučaj je zakomplikovala i činjenica da su navodna krivična djela počinjena prije donošenja novog zakona o korupciji 2001. godine. Međutim, istražitelji SFO su bili mišljenja da je ovaj slučaj moguće procesuirati u skladu sa zakonom o prevenciji korupcije iz 1906. godine.

Hamović se prvo nalazio pod istragom bh. tužilaštva, a kasnije i SFO-a zbog navodnog podmićivanja koje se dovodi u vezu sa unosnim poslovima sa elektroprivredom Crne Gore, što je njegovoj tadašnjoj kompaniji donijelo milijunsku zaradu u kratkom roku. Glasnogovornik EFT-a ove poslove pravda time da su omogućili ‘likvidnost’ čitavog sistema.

Nakon što je već ranije obustavljen istraga Tužilaštva BiH, sa prekidom istrage SF0-a stavljena je tačka na navode protiv Hamovića.

'Ne mogu zamisliti šta bi se moglo desiti pa da obnovimo istragu', kaže Jaffa.

Glasnogovornik EFT-a, koji je ranije odbacio sve navode o malverzacijama ove kompanije, pozvao se na pisanu izjavu u kojoj se navodi slijedeće: 'Mi smo očigledno oduševljeni da su sve neželjene smetnje koje je ova stvar izazvala sada završene.'